

03 SEP 1997

TUNG TEMUI DR MAHATHIR (bergambar)

KUALA LUMPUR, 3 Sept (Bernama) -- Tung Chee-hwa, pemimpin pertama Hong Kong di bawah pentadbiran China, mengadakan perbincangan dengan Datuk Seri Dr Mahathir Mohamad di Jabatan Perdana Menteri di sini hari ini.

Beliau berada di sini untuk lawatan dua hari, lawatan luar negaranya yang pertama sejak menjadi ketua eksekutif bagi bekas jajahan British itu.

Dalam satu temubual menerusi program Q&A terbitan CNN malam tadi, Dr Mahathir berkata Kuala Lumpur ingin mengetahui lebih mendalam mengenai sistem di Hong Kong sekarang setelah ia menjadi sebahagian daripada China.

Dr Mahathir berkata Malaysia berhasrat meneruskan urusannya seperti biasa dengan Hong Kong.

Tung pula dilaporkan berkata beliau akan menggunakan lawatan itu untuk menjelaskan mengenai peranan Hong Kong di peringkat antarabangsa dan peranan aktifnya dalam bidang kewangan.

Beliau juga dijangka memperkenalkan pembangunan ekonomi terkini Hong Kong untuk menarik pelaburan.

Jadualnya termasuk menemui Datuk Seri Anwar Ibrahim, Menteri Luar Datuk Seri Abdullah Ahmad Badawi dan Menteri Pengangkutan Datuk Seri Dr Ling Liong Sik.

Tung akan juga melawat Singapura. -- BERNAMA

ES MAI